

**Bantu Najib kembalikanimbangan
Utusan Malaysia Online
April 03, 2011
Oleh Baharom Mahusin**

HARI ini genap dua tahun Datuk Seri Najib Tun Razak mengemudi pentadbiran negara. Tempoh dua tahun adalah suatu jangka masa yang amat singkat. Baru 730 hari beliau menjadi Perdana Menteri Malaysia.

Terlalu pantas masa berlalu sedangkan cabaran yang mendatang begitu hebat.

Sebagai suatu perbandingan, Menara Berkembar Petronas di Kuala Lumpur mengambil masa kira-kira lima tahun untuk disiapkan antara tahun 1992 dan 1997. Keseluruhannya, 1,825 hari diperlukan untuk membina sebuah bangunan yang ketika ia siap merupakan bangunan yang tertinggi di dunia.

Najib mengambil alih pentadbiran negara ketika politik Malaysia kucar-kacir ekoran pentadbiran yang lemah dan persepsi negatif rakyat pada era kepimpinan Tun Abdullah Ahmad Badawi.

Sungguhpun telah dilatih berpolitik dan mentadbir sejak tahun 1976, iaitu sejak beliau berusia 23 tahun lagi, namun apabila beliau mengambil alih pentadbiran sebagai Perdana Menteri pada 3 April 2009, Najib mewarisi satu situasi politik yang tidak pernah kita saksikan di Malaysia sejak negara merdeka.

Dalam buku autobiografi Tun Dr. Mahathir Mohamad, *A Doctor In The House*, bekas perdana menteri itu menyifatkan situasi politik negara ketika ini umpama quagmire, iaitu istilah lama bahasa Inggeris untuk lumpur jerlus. Berpolitik di atas lumpur jerlus, menurutnya, amat berbahaya.

"Apa yang jelas ialah kita memerlukan pemimpin yang kuat untuk memandu kita keluar daripada lumpur jerlus ini, dan melainkan langkah-langkah radikal diambil, Barisan Nasional tidak akan selamat pada pilihan raya umum akan datang," tulis Dr. Mahathir.

Berdasarkan pandangan itu, Najib tidak mempunyai pilihan lain. Untuk menyelamatkan negara daripada lumpur jerlus politik yang menjadi analogi Dr. Mahathir, beliau perlu menjadi pemimpin yang kuat. Najib perlu diberi dokongan untuk mengembalikanimbangan politik tanah air.

Bukan itu sahaja, beliau kena disokong oleh jentera parti dan kerajaan yang kukuh. Rakyat daripada pelbagai golongan, kaum dan agama wajar memahami situasi Najib ini, kerana sehinggaimbangan politik tersebut kembali, kita harus sedar bahawa kita semua berdiri di atas platform yang rapuh.

Dua tahun telah berlalu sejak beliau berkuasa sebagai Perdana Menteri. Dalam tempoh itu, Najib memperkenalkan dasar-dasar baharu, menjaga dan melonjakkan ekonomi, mempertahankan serta melindungi kebajikan rakyat.

Begitu banyak program baharu kerajaan diperkenalkan daripada slogan 1Malaysia, projek-projek Bidang Keberhasilan Ekonomi Negara (NKRA) dan langkah-langkah progresif ke arah menjayakan Program Transformasi Ekonomi.

Transformasi

Najib telah pun melaporkan sebahagian daripada kejayaan yang dicapai. Pada Januari lalu, selepas tiga bulan pelaksanaan Program Transformasi Ekonomi sejak 25 Oktober 2010, sebanyak 19 projek dan pembangunan diperkenalkan daripada projek-projek NKRA. Projek-projek itu merangkumi pelaburan berjumlah RM67 bilion, menambah RM36 bilion kepada pendapatan kasar negara dan mencipta 35,000 peluang pekerjaan.

Indeks Prestasi Utama (KPI) dalam bidang ekonomi dan bukan ekonomi ditetapkan dan menjadi sasaran yang perlu dicapai oleh menteri-menteri dan jentera kerajaan di bawah Najib.

Yang ketara daripada penekanan tersebut adalah kemunculan iklim pelaburan yang amat memberangsangkan, dengan Bursa Malaysia – yang menjadi salah satu petunjuk ekonomi – mencapai paras tertinggi baru melebihi 1,555 mata dengan nilai pasaran modal kira-kira RM700 bilion.

Najib yang berusia 57 tahun, dengan latar belakangnya sebagai anak bekas perdana menteri Allahyarham Tun Abdul Razak Hussein, mengotakan janji-janji khususnya untuk rakyat di bandar dan juga pedalaman. Satu projek ekonomi penting yang akan dilaksanakannya untuk berjuta-juta rakyat ialah projek Aliran Transit Mass (MRT) Lembah Klang yang menelan pelaburan RM36 bilion dan bakal mencipta 130,000 pekerjaan pada kemuncak pelaksanaan projek itu nanti.

Projek-projek infrastruktur seumpama itu, seperti yang diperlihatkan pada tahun-tahun 1990-an, amat besar impaknya kepada ekonomi negara dan kesejahteraan rakyat.

Najib, dengan latar belakang pendidikan ekonomi yang diperoleh di universiti di England, mempunyai kefahaman yang jelas tentang apa yang ingin dicapainya dalam bidang ekonomi.

Membawa rakyat bersama-sama dalam agenda ekonomi menjadi prioriti kerajaan, manakala dari sudut politik beliau berusaha untuk menyelamatkan Malaysia daripada terjerumus menjadi sebuah negara yang tidak habis-habis berhadapan dengan pertarungan politik yang sia-sia.

Dalam proses itu, beliau berjanji berlaku adil kepada semua kaum, iaitu kata-kata yang terpahat dalam ucapan penerimaan jawatan Perdana Menteri dua tahun lalu. Bagi Najib, semua rakyat, sama ada anak muda Iban di Ulu Kapit, Sarawak atau warga emas berketurunan Siam di Tumpat, Kelantan, “tidak ada sesiapa merasakan diri mereka tercicir atau terpinggir daripada wacana nasional.”

Dua tahun bersama rakyat, Najib mula memperoleh rentak dan jalan keluar daripada kemelut politik yang diwarisinya. Rakyat, terutamanya orang muda, semakin ramai merasakan Najib seorang Perdana Menteri yang bekerja keras, terbuka, ramah, prihatin dan fokus dalam kepimpinannya. Mereka mula memahami muslihat politik musuh-musuhnya. Kepada sesetengah pihak, musuh politik itu juga kini sudah menjadi musuh negara.

Akaun Facebook beliau, misalnya, kini telah mencecah lebih 600,000 orang teman Facebook, jauh meninggalkan akaun Facebook selebriti hiburan seperti Fara Fauzana, malahan seorang pemimpin pembangkang menghadapi masalah untuk menyaingi populariti Najib dalam Facebook ekoran pemberontakan para peminatnya setelah terbongkar satu skandal seks.

Najib sedikit demi sedikit telah berjaya menambah jumlah sahabat dan mengurangkan bilangan musuh – satu gerakan yang menjadi prasyarat kejayaan mana-mana pemimpin dalam apa sahaja sistem politik.

Satu pungutan pendapat dalam kalangan rakyat Malaysia yang dijalankan pada Disember lalu menunjukkan lebih dua per tiga responden kajian tersebut berpuas hati dengan kepimpinan Najib dan merasakan Malaysia sedang menghala ke arah yang betul.

Responden Melayu dan India semakin bertambah keyakinan mereka kepada Perdana Menteri dan menyokong balik Barisan Nasional selepas mereka memberikan mesej politik yang pahit kepada Barisan Nasional pada pilihan raya umum 2008 sewaktu komponen parti pelbagai kaum itu dipimpin oleh Abdullah Ahmad Badawi.

Bagaimanapun, berdasarkan kajian tersebut dan pola mengundi para pengundi Cina dalam beberapa pilihan raya kecil yang diadakan dalam tempoh 24 bulan lalu, para pengundi Cina belum sepenuhnya tenteram perasaan mereka.

Sebahagian daripada sentimen itu merupakan reaksi semula jadi terhadap kegagalan parti-parti Cina dalam Barisan Nasional seperti MCA dan Gerakan. MCA dan Gerakan masih belum dapat menangkap imaginasi politik masyarakat Cina yang diwakili oleh parti-parti itu.

Paling rumit

Membawa kembali pengundi Cina ke pangkuan kerajaan mungkin menjadi masalah paling rumit Najib setakat ini ketika beberapa saingan politik lain dalam dunia siber, perang persepsi, perdebatan ekonomi dan kos sara hidup, serta usaha menampan kesan ekonomi global ke atas Malaysia telah berjaya ditangani dengan baik.

Dalam satu interviu dengan media asing beberapa hari lalu, Najib memberi isyarat bahawa beliau menanti keputusan pilihan raya negeri Sarawak pada 16 April ini sebelum menentukan bilakah akan mengadakan pilihan raya umum.

Sebenarnya Perdana Menteri mempunyai tempoh sehingga 27 April 2013 sebelum mandat Dewan Rakyat sekarang, yang diperoleh pada Mac 2008, berakhir. Di atas kertas beliau mempunyai masa selama dua tahun satu bulan lagi sebelum membubarkan Dewan Rakyat.

Isunya: Sanggupkah Najib menunggu selama itu? Persoalan lain: Sabarkah rakyat menanti sehingga 27 April 2013 untuk membantu Najib mengembalikanimbangan kuasa yang retak pada Mac 2008?

Sejak menjadi Perdana Menteri dua tahun lalu, Presiden UMNO dan Ahli Parlimen Pekan itu dalam diam dan secara terbuka telah pun menyediakan Barisan Nasional untuk menghadapi pilihan raya umum.

Bukan rahsia lagi bahawa prestasi lebih baik Barisan Nasional yang menang dengan majoriti lebih besar dalam lima pilihan raya kecil di Batu Sapi, Galas, Tenang, Merlimau dan Kerduu sejak November 2010 ada kaitan dengan persediaan rapi dan efisiensi kerajaan pimpinannya bagi menghadapi saat-saat penentuan politik itu.

Dalam pilihan raya negeri di Sarawak dan pilihan raya umum akan datang, rakyat harus membantu Najib. Mengembalikanimbangan politik Malaysia amat mustahak untuk percaturan Najib seterusnya dalam usaha mengangkat Malaysia menjadi negara maju dalam acuan sendiri menjelang 2020.

Tahun keramat 2020 itu dirintis ideanya oleh Dr. Mahathir, tokoh yang menganggap bapa Najib, Allahyarham Tun Razak, sebagai "mentor dan pelindungnya". Status negara maju dalam Wawasan 2020 itu menjadi impian yang dikongsi oleh Najib, Dr. Mahathir dan kita semua.

Dengan sokongan rakyat serta rating tinggi dalam ekonomi, dalam beberapa minggu dan bulan mendatang, bermula daripada pilihan raya negeri Sarawak, para pengundi di Malaysia bakal menggunakan tanggungjawab mereka dalam menentukan hala tuju negara.

Dalam satu ucapan, Najib menegaskan pendekatannya: "Kita memberi tumpuan penuh kepada aspek keberhasilan dan dengan mencapainya, saya berharap dapat merangsang majoriti rakyat Malaysia yang yakin kepada kita dan mempengaruhi kumpulan minoriti yang berfikiran negatif untuk menyokong kita. Akhirnya, ini merupakan agenda transformasi negara yang kita mesti bawa semua orang bersama, dalam semangat sebenar 1Malaysia, Rakyat Didahulukan, Prestasi Diutamakan."

Itulah Najib, Perdana Menteri yang sewaktu dilantik pada 3 April 2009 lalu dengan penuh rendah diri mengajak kita semua bersama-samanya menempuh satu perjalanan bernegara yang hebat.

Copyright © UTUSAN MELAYU (M) BERHAD

Source: http://www.utusan.com.my/utusan/info.asp?y=2011&dt=0403&pub=utusan_malaysia&sec=Rencana&pg=re_01.htm&arc=hive